

皇
朝
文
鑑

皇朝文鑑

四部叢刊集部

上海涵芬樓借古里
瞿氏鐵琴銅劍樓藏
宋刊本景印原書板
匡高營造尺六寸四
分寬四寸九分

皇朝文鑑序

中奉大夫試禮部尚書兼翰林學士兼侍讀
兼太子詹事兼脩國史管城縣開國子食邑
五百戶賜紫金魚袋臣周必大奉

聖旨撰

臣聞文之盛衰主乎氣辭之工拙存乎理昔者
帝王之世人有所養而教無異習故其氣之盛
也如水載物小大無不浮其理之明也如燭照
物幽隱無不通國家一有殊功異德卓絕之跡
則公卿大夫下至於士民皆能正列其義被飾

而彰大之載於書詠於詩略可考已後世家異
政人殊俗剛大之不充而委靡之習勝道德之
不明而非僻之說入作之弗振也索之易窮也
譬之盪舟於陸終日馳驅無以致遠搏土爲像
丹青其外而中奚取焉此豈獨學者之罪哉上
之教化容有未至焉爾時不否則不泰道不晦
則不顯天啓

藝祖生知文武取五代破碎之天下而混一之
崇雅黜浮汲汲乎以垂世立教爲事

列聖相承治出於一援毫者知尊周孔游談者

羞稱楊墨是以二百年間英豪踵武其大者固已羽翼六經藻飾治具而小者猶足以吟詠情性自名一家蓋建隆雍熙之間其文偉咸平景德之際其文博天聖明道之辭古熙寧元祐之辭達雖體制互興源流間出而氣全理正其歸則同嗟乎此非唐之文也非漢之文也實我宋之文也不其盛哉

皇帝陛下天縱將聖如夫子

煥乎文章如帝堯

萬幾餘暇猶玩意於衆作謂篇帙繁夥難於徧

覽思擇有補治道者表而出之乃

詔著作郎呂祖謙發三館四庫之所藏裒縉紳故家之所錄斷自

中興以前彙次來上古賦詩騷則欲主文而誦諫典冊詔誥則欲溫厚而有體奏疏表章取其諒直而忠愛者箴銘贊頌取其精慤而詳明者以至碑記論序書啓雜著大率事辭稱者爲先事勝辭則次之文質備者爲先質勝文則次之復謂律賦經義

國家取士之源亦加采掇略存

一代之制定爲一百五十卷規模先後多本

聖心承

詔於淳熙四年之仲冬奏

御於六年之正月

賜名曰

皇朝文鑑而

命臣爲之序臣待罪翰墨才識駑下固無以推

原作者闡繹

隆指抑嘗竊讀大雅之詩而知

祖

宗所以化成天下者矣棧樸官人也早麓受祖也辭雖不同而俱以遐不作人爲言蓋魚躍于淵氣使之也追琢其章理貫之也況夫雲漢昭于上豈第施於下濟濟多士其有不觀感而化者乎是則

祖

宗啓之

陛下繼焉樂文王之壽考申太王王季之福祿人才將至於不可勝用豈止乎能文而已臣雖不肖尚當執筆以頌作成之效云臣謹序

太史成公編皇朝文

鑑始末



淳熙丁酉

孝宗因觀文海下臨安

府今委教官校正畢

刊行其年冬十一月

翰林學士周公必大夜
直奏事語次及之因
奏曰此書乃近時江佃

類編殊無倫理書坊刊

行可身今降

旨校正刻板事體則

重恐難傳後莫若委館
閣別加詮次以成一代之
書

上大以為然一日參知政

事王公准李公彥穎

奏事

上顧兩參道周公前語
俾舉其人李公首以著
作佐郎鄭鑑為對

上默然顧王公曰如何
淮對以臣愚見非祕書
郎呂祖謙不可

上以首肯之曰卿可即

宣諭朕意且令專取有

益治道者王公退如

上言召太史宣諭太史

承命不辭即開祕書

集庫所藏及因昔所

記憶訪求於外所得文
集凡八百家搜檢編集
手不停披至次年十月
書乃克成未及上而屬
疾

上聞之一日因王公奏事

問曰聞呂某得末疾朕固
憂其太肥向令其編文海今
已成否王公對曰呂某雖病
此書編類極精繕寫將畢
方欲繳進適值有疾故未
果

上甚喜曰朕欲見諸臣奏
議庶有益於治道卿可
諭令進來王公即使其從
具宣

聖諭以之乃以其書繳申
三省投進書既奏御